

No. 860.

AKTA UNIVERSITI DAN KOLEJ UNIVERSITI 1971

PERLEMBAGAAN UNIVERSITI MALAYA

STATUT UNIVERSITI MALAYA
(JAWATANKUASA PEMILIH DAN PIHAK BERKUASA MELANTIK) 2024

Pada menjalankan kuasa yang diberi di bawah subseksyen 35(1) Perlembagaan Universiti Malaya, Canselor membuat Statut yang berikut:

Nama

1. Statut ini bolehlah dinamakan Statut Universiti Malaya (Jawatankuasa Pemilihan dan Pihak Berkuasa Melantik) 2024, dan hendaklah berkuat kuasa pada tarikh ia disiarkan dalam *Warta*.

Keahlian Jawatankuasa

2. (1) Keahlian Jawatankuasa Pemilihan dan Pihak Berkuasa Melantik bagi maksud pelantikan ke sesuatu kursi dan pelantikan atau kenaikan pangkat ke jawatan Profesor Kanan dan Profesor hendaklah terdiri daripada—

- (a) Naib Canselor yang hendaklah menjadi Pengerusi;
- (b) seorang ahli Lembaga yang dilantik oleh Lembaga;
- (c) dua (2) ahli Senat bertaraf Profesor yang dilantik oleh Senat; dan
- (d) Dekan, Pengarah, Pengarah Eksekutif Fakulti, Sekolah, Pusat, Akademi atau Institut atau apa-apa nama lain yang ditetapkan oleh Jawatankuasa Pengurusan Universiti yang baginya kursi itu diuntukkan.

(2) Keahlian Jawatankuasa Pemilihan dan Pihak Berkuasa Melantik bagi maksud pelantikan dan kenaikan pangkat ke jawatan Profesor Madya dan guru (selain daripada jawatan Profesor Kanan atau Profesor) atau yang bersamaan dengannya di bawah mana-mana skim perkhidmatan yang diterima pakai oleh Universiti, hendaklah terdiri daripada ahli yang berikut yang dilantik oleh Lembaga—

- (a) Timbalan Naib Canselor yang bertanggungjawab bagi hal ehwal akademik yang hendaklah menjadi Pengerusi;
- (b) tiga (3) ahli Senat bertaraf Profesor; dan

- (c) Dekan, Pengarah, Pengarah Eksekutif Fakulti, Sekolah, Pusat, Akademi atau Institut atau apa-apa nama lain yang ditetapkan oleh Jawatankuasa Pengurusan Universiti yang baginya jawatan itu diuntukkan.

(3) Keahlian Jawatankuasa Pemilihan dan Pihak Berkuasa Melantik bagi maksud pelantikan dan kenaikan pangkat ke jawatan Pendaftar, Bursar, Ketua Pustakawan dan Penasihat Undang-Undang hendaklah terdiri daripada—

- (a) Naib Canselor yang hendaklah menjadi Pengerusi;
- (b) Seorang ahli Lembaga yang dilantik oleh Lembaga; dan
- (c) dua (2) ahli Senat bertaraf Profesor yang dilantik oleh Senat.

(4) Keahlian Jawatankuasa Pemilihan dan Pihak Berkuasa Melantik bagi maksud pelantikan dan kenaikan pangkat pekerja Universiti dalam kumpulan pengurusan dan profesional hendaklah terdiri daripada ahli-ahli berikut yang dilantik oleh Lembaga—

- (a) Pelantikan dan kenaikan pangkat pekerja Universiti dalam kumpulan pengurusan dan profesional bagi Gred 9 hingga Gred 13 atau apa-apa gred jawatan yang setaraf:
 - (i) Pendaftar hendaklah menjadi Pengerusi;
 - (ii) dua (2) orang profesor yang dilantik oleh Naib Canselor; dan
 - (iii) Ketua Jabatan atau Ketua Pusat Tanggungjawab (PTj).
- (b) Sekiranya Pendaftar tidak dapat mempengerusikan Jawatankuasa tersebut, salah seorang profesor yang dilantik di bawah subperenggan 2(4)(a)(ii) hendaklah menjadi Pengerusi.
- (c) Pelantikan dan kenaikan pangkat pekerja Universiti dalam kumpulan pengurusan dan profesional bagi Gred 14 atau apa-apa gred jawatan yang setaraf:
 - (i) Pendaftar yang hendaklah menjadi Pengerusi;
 - (ii) tiga (3) profesor yang dilantik oleh Naib Canselor; dan
 - (iii) seorang ahli Jawatankuasa Pengurusan Universiti yang dilantik oleh Naib Canselor.

(5) Keahlian Jawatankuasa Pemilihan dan Pihak Berkuasa Melantik bagi maksud pelantikan dan kenaikan pangkat pekerja Universiti dalam kumpulan sokongan hendaklah terdiri daripada ahli-ahli berikut yang dilantik oleh Pengurusan Universiti:

- (a) Pendaftar atau wakilnya dalam kalangan pegawai atau pekerja Universiti yang hendaklah menjadi Pengerusi; dan

(b) tiga (3) pegawai atau pekerja Universiti.

Setiausaha

3. Pengerusi hendaklah melantik seorang Setiausaha dalam kalangan pegawai atau pekerja Universiti.

Laporan Penilaian Penilai Luar

4. (1) Bagi maksud pelantikan ke suatu kursi, dan pelantikan dan kenaikan pangkat ke jawatan Profesor Kanan dan Profesor, Jawatankuasa Pemilih dan Pihak Berkuasa Melantik hendaklah menimbang laporan penilaian daripada sekurang-kurangnya tiga (3) orang penilai luar.

(2) Bagi maksud pelantikan dan kenaikan pangkat ke jawatan Profesor Madya, Jawatankuasa Pemilih dan Pihak Berkuasa Melantik hendaklah menimbang laporan penilaian daripada sekurang-kurangnya dua (2) orang penilai luar.

(3) Senarai calon yang layak berserta kenyataan kelayakan calon itu hendaklah diberikan kepada penilai luar itu.

(4) Senarai calon itu boleh juga mengandungi nama orang yang tidak memohon jawatan itu tetapi yang difikirkan layak oleh Pihak Berkuasa Universiti untuk dipertimbangkan.

(5) Jawatankuasa Pemilih dan Pihak Berkuasa Melantik tidak boleh membuat apa-apa pemilihan sehingga ia telah menerima dan mempertimbangkan laporan mengenai calon itu daripada penilai luar itu.

(6) Penilai luar itu boleh, dalam laporannya kepada Jawatankuasa Pemilih dan Pihak Berkuasa Melantik, memberikan nama dan penilaian orang lain yang tidak disebutkan dalam senarai calon yang dikemukakan kepada pakar luar itu di bawah subperenggan (3) atau (4) untuk pertimbangan pelantikan atau kenaikan pangkat.

Panggilan menghadiri mesyuarat

5. Jawatankuasa Pemilih dan Pihak Berkuasa Melantik boleh memanggil mana-mana orang untuk menghadiri mesyuarat bagi menasihatinya tentang apa-apa perkara yang dibincangkan tetapi orang itu tidak berhak mengundi (*ex-officio*).

Kuorum mesyuarat

6. Kuorum bagi semua mesyuarat Jawatankuasa Pemilih dan Pihak Berkuasa Melantik hendaklah terdiri daripada tiga (3) orang ahli termasuk Pengerusi.

7. Tempoh pelantikan bagi ahli-ahli semua Jawatankuasa Pemilih dan Pihak Berkuasa Melantik ialah tiga (3) tahun, kecuali *ex-officio*.

Pelantikan dan kenaikan pangkat

8. (1) Pelantikan ke suatu jawatan kursi dan pelantikan atau kenaikan pangkat bagi jawatan Profesor Kanan dan Profesor hendaklah dibuat oleh Lembaga atas nasihat Jawatankuasa yang berkenaan.

(2) Pelantikan dan kenaikan pangkat bagi jawatan Profesor Madya dan guru (selain daripada jawatan Profesor Kanan atau Profesor) atau yang bersamaan dengannya di bawah mana-mana skim perkhidmatan yang diterima pakai oleh Universiti hendaklah dibuat oleh Timbalan Naib Canselor yang bertanggungjawab bagi hal ehwal akademik atas nasihat Jawatankuasa yang berkenaan.

(3) Pelantikan dan kenaikan pangkat ke jawatan Pendaftar, Bursar, Ketua Pustakawan dan Penasihat Undang-Undang hendaklah dibuat oleh Lembaga atas nasihat Jawatankuasa yang berkenaan.

(4) Pelantikan dan kenaikan pangkat bagi pekerja Universiti selain daripada yang disebut di subperenggan (1), (2) dan (3) hendaklah dibuat oleh Pendaftar atau mana-mana pegawai kanan Universiti atas nasihat Jawatankuasa yang berkenaan.

(5) Surat cara pelantikan dan kenaikan pangkat yang dibuat di bawah Statut ini hendaklah ditandatangani oleh pegawai-pegawai sepertimana dinyatakan di dalam subperenggan 8(1), (2), (3) dan (4).

9. Tiada apa-apa perbuatan atau peninggalan oleh Jawatankuasa Pemilih dan Pihak Berkuasa Melantik yang menjalankan fungsinya sebelum kuat kuasanya Statut ini boleh menjadi tidak sah atas sebab Statut ini belum berkuat kuasa.

Pembatalan

10. Statut Universiti Malaya (Jawatankuasa-Jawatankuasa Pemilih) 1997 adalah dibatalkan.

Dibuat 9 Disember 2024

SULTAN NAZRIN MUIZZUDDIN SHAH IBNI
ALMARHUM SULTAN AZLAN MUHIBBUDDIN SHAH AL-MAGHFUR-LAH
Canselor
Universiti Malaya